

摘藻堂四庫全書薈要

史部

欽定四庫全書薈要

史部

文獻通考卷二百六十八

九



欽定四庫全書薈要卷九千五百八十九

史部

文獻通考卷二百六十八

鄱陽馬端臨貴與著

建考九

後漢王侯

更始二年既誅王莽遷都長安李崧趙萌說更始宜悉
王諸功臣朱鮪爭之以為高祖約非劉氏不王更始乃
先封諸宗室祉為定陶王慶為燕王歆為元氏王嘉為

漢中王賜為宛王信為汝陰王然後立王匡為泚陽王
王鳳為宣城王朱鮪為膠東王王常為鄧王申屠建為
平氏王陳牧為陰平王衛尉大將軍張卬為淮陽王執
金吾大將軍廖湛為穰王尚書胡殷為隨王柱天大將
軍李通為西平王五威中郎將李軼為舞陰王水衡大
將軍成丹為襄邑王驃騎大將軍宋佻為潁陰王尹尊
為鄧王唯朱鮪辭不受

定陶王祉光武族兄春陵康侯敞之子漢兵起祉兄弟

相率從軍更始立以祉為太常將軍紹封春陵侯入關
封定陶王建武二年改封城陽王十一年薨謚恭王子
平為蔡陽侯奉祉祀 真 禹 嘉

燕王慶春陵侯敞同產弟更始入關封燕王更始敗為
亂兵所殺子順歸光武封成武侯十一年卒 遵 弇
亡嗣國除

元氏王欽光武族父更始入關封元氏王為侍中更始
敗歸洛陽建武二年改封欽為泗水王十年薨子終封

淄川王薨子柱為郎侯奉終祀

鳳

終子

別封曲陽侯

漢中王嘉光武族兄春陵侯敞同產弟漢兵起從軍破宛奉興德侯入長安為漢中王鄧禹西征嘉自歸到洛陽從征伐後封順陽侯十五年卒子參嗣 循 章

宛王賜光武族兄蒼梧太守利之孫伯升起兵隨衆攻諸縣更始立以為光祿勳代伯升為大司徒都長安封宛王光武即位歸洛陽建武二年封慎侯十三年更戶邑為安成侯二十八年卒子閔嗣 商 昌

汝陰王信賜之兄子從伯升起兵更始即位為奮威大將軍入長安封為汝陰王將兵平定江南據豫章光武即位詣洛陽封為汝陰侯永平十三年坐楚王英事國除

王匡新市人王莽末南方饑饉人庶入野澤掘鳧茈而食之更相侵奪匡與王鳳為平理爭訟遂推為渠帥衆數百人藏於綠林中號新市兵更始立以匡為定國上公遣攻洛陽拔之更始入長安封為沘陽王匡與張卬

橫暴三輔所授官爵皆羣小賈陞關中離心與張卬守河東為鄧禹所破後叛更始降赤眉

王鳳新市人與王匡共起綠林中更始立以鳳為成國上公入長安封為宣城王

朱鮪新市人王莽地皇三年與王匡等起兵北入南陽號新市兵皆自稱將軍更始立以鮪為大司馬入長安封為膠東王鮪以為非劉宗不受封乃徙為左大司馬與李通王常等鎮撫關東光武即位鮪以伯升被害時

預其謀又諫更始無遣蕭王北征遂堅守洛陽不敢降
帝令岑彭說之鮪乃降拜平狄將軍封扶溝侯後為少
府傳封累世

王常潁川舞陽人王莽末與王鳳等起兵入南郡號下
江兵時漢兵敗新市平林兵各欲解去伯升乃造下江
壁說常以合從之利常即率諸將引兵與漢兵合遂破
殺莽將更始立以常為廷尉大將軍入昆陽與光武共
破尋邑都長安封為鄧王更始敗常自歸於光武封山

桑侯遷為漢忠將軍後拜常為橫野大將軍位次與諸將絕席十二年薨謚節侯子廣嗣徙封石城侯後坐楚王事國除

申屠建不知何許人漢兵起更始立為西屏大將軍將兵攻武關莽既誅自長安奉迎遷都封為平氏王赤眉西入關更始遣兵拒之師敗張卬廖湛等與建謀共劫更始掠城中東歸南陽謀泄為更始所殺

陳牧平林人王莽地皇三年與廖湛聚眾數千人號平

林兵劉聖公因往從牧等為其軍安集掾光武及伯升亦起舂陵與諸部合兵而進更始即位以牧為大司空入長安封為陰平王赤眉西入關立劉盆子更始使牧與王匡等屯新豐拒之張印申屠建等謀劫更始東奔事覺更始殺建印遂勒兵攻更始更始兵敗奔新豐疑匡牧等與印同謀乃收斬之

張印新市人地皇三年與王匡朱鮪等共起兵號新市兵自稱將軍後屬漢兵更始即位以印為衛尉大將軍

入長安封淮陽王與王匡等輔政橫暴三輔所授官爵皆羣小賈豎四方怨叛赤眉西入關卽與王匡守河東為鄧禹所破還奔長安欲掠城中轉攻所在東歸南陽復為羣盜更始不從卽等謀劫更始謀泄遂勒兵掠東西市戰於宮中更始大敗赤眉至高陵匡卽迎降之更始降赤眉卽與謝祿謀縊更始殺之

廖湛平林人下江新市兵起湛與陳牧聚衆千餘人號平林兵以應之聖公為其軍安集掾聖公立拜湛為執

金吾大將軍入長安封為穰王及赤眉西入關王匡張
卬謀東奔申屠建及湛以為然入說更始不從乃謀劫
更始成前計事覺遂勒兵掠東西市更始與戰大敗後
與王匡等同降赤眉為赤眉將兵攻順陽侯嘉兵敗為
嘉所殺

胡殷不知何許人更始即位以為尚書入長安封隨王
赤眉西入關更始兵敗王匡張卬等欲勒兵掠城中以
自富東歸南陽更始不從卬乃與殷等謀欲劫更始謀

泄仲殷等遂勒兵掠東西市更始與戰大敗後與王匡等降赤眉

李通南陽宛人王莽時為五威將軍從事不樂為吏自免歸下江新市兵起通陳讖文勸光武起兵更始立以通為柱國大將軍輔漢侯至長安封西平王持節還鎮荊州光武即位徵為衛尉建武二年封固始侯拜大司空十八年卒謚恭侯子音嗣定黃壽

李軼南陽宛人通之從弟與通共謀起兵更始立軼為

五威中郎將入長安封舞陰王後與朱鮪共守洛陽為鮪所殺

成丹不知何許人亡命綠林中聚衆至七八千人號下江兵後從漢軍更始立以為水衡大將軍入長安封襄邑王赤眉西入關立劉盆子更始遣丹與王匡等屯新豐以拒之後為更始所殺

尹尊不知何許人更始封為郾王光武時據地最強帝使執金吾賈復擊降之

宋佻

事跡首尾
史所不載

宗姓王

王子侯附

齊武王繡光武長兄與光武共起兵更始即位為大司徒更始忌而殺之光武建武二年立繡長子章為太原王十一年徙為齊王二十一年薨謚曰哀王

殤王石 晁坐罪貶蕪湖侯 無忌石子復封齊王

喜 承建安十一年國除

魯王興齊武王次子建武二年封嗣光武兄仲後後徙

為北海王立三十九年薨謚靖王子敬王睦 哀王基

威坐罪死 頃王普 恭王翼 康王亡後

下博侯張齊武王孫殤王石弟建武三十年封 他人

臨邑侯復北海靖王子建武三十年封 駒駘

趙孝王良光武叔父更始立以良為國三老更始敗亡

奔洛陽建武二年封廣陽王五年徙趙王十三年降為

趙公立十六年薨子節王栩 頃王商 靖王宏 惠

王乾 懷王豫 獻王赦 珪魏受禪降為崇德侯

城陽恭王祉 泗水王欽 安成孝侯賜 順陽懷侯

嘉 成武孝侯順

事跡並見更始所封諸王下

高鄉侯堅城陽恭王子建武十三年封

中山王茂歛從父弟王莽末起兵後降光武封中山王
十三年以疏屬降為穰侯

宜春侯匡茂弟亦起兵附漢建武二年封 浮 護

穰坐罪貶為亭侯

白牛侯嵩安成孝侯賜之子建武三十年封後坐楚事

國除

甘里侯閔弋陽侯國成武孝侯順叔父弘之子建武二年封

黃李侯廣順陽侯嘉之子建武十三年封

襄邑侯劉求更始長子更始降赤眉為謝祿所殺明年求兄弟與母詣洛陽帝封求為襄邑侯奉更始祀後徙封成陽侯卒子巡嗣復徙封灌澤侯姚

穀孰侯歆壽光侯鯉俱更始子求弟與求同時封

建武二年詔曰惟宗室列侯為王莽所廢先靈無所依
歸朕愍之其並復故國若侯身已歿屬所上其子孫見
名尚書封拜

十三年詔曰長沙王興真定王得河間王邵中山王茂
皆襲爵為王不應經義其以興為臨湘侯得為真定侯
邵為樂成侯茂為單父侯其宗室及絕國封侯者凡一
百三十七人降趙王良為趙公太原王章為齊公魯王

興為魯公

長沙王興河間王邵事跡
首尾史不載餘並見前

右光武時封宗室王侯

東海恭王彊建武二年立為皇太子十七年母郭后廢
彊陳懇誠願備蕃國十九年封為東海王二十八年就
國帝以彊廢不以過去就有禮故優以大封兼食魯郡
合二十九縣都魯立十八年薨子靖王政嗣立四十四
年薨子頃王肅嗣立二十三年薨子孝王臻嗣立三十
一年薨子懿王祗嗣立四十四年薨子羨嗣二十年魏
受禪以為崇德侯

永元十六年封頃王肅第二十一人皆為列侯 永
建二年封孝王臻二弟敏儉為鄉侯 初平四年封
懿王祗子琬為汝陽侯

沛獻王輔建武十五年封右馮翊公十七年郭后廢為
中山太后故徙輔為中山王并食常山郡二十年徙封
沛王二十八年就國立四十六年薨子釐王定嗣立十
一年薨子節王正嗣立十四年薨子孝王廣嗣立三十
五年薨子幽王榮嗣立二十年薨子孝王琮嗣薨子恭

王曜嗣薨子契嗣魏受禪廢為侯

中元二年封獻王輔子寶為沛侯 永平元年封寶弟嘉為僮侯 元和二年封釐王定弟十二人為鄉侯 元興元年封節王正弟二人為縣侯

楚王英以建武十五年封為楚公十七年進爵為王二十八年就國英母許氏無寵故英國最貧小三十年以臨淮之取慮須昌二縣益楚國十二年坐交方士造作圖書有逆謀廢徙丹陽自殺立三十三年國除建初元

年封英子楚侯种五弟皆為列侯並不得置相臣吏人种後徙封陸侯子度 拘

濟南安王康建武十五年封濟南公十七年為王二十八年就國三十年以祝阿安德朝陽平昌隰陰重丘六縣益濟南國立五十九年薨子簡王錯嗣立六年薨子孝王香嗣立二十年薨無子國絕

永建元年順帝立錯子阜陽侯顯為嗣是為釐王立三年薨子悼王廣嗣立二十五年薨無子國除

中元二年封安王康子德為東武城侯 永元十一年封簡王錯第七人為列侯 永初二年封孝王香第四人為列侯香又上書分爵土封叔父篤子丸西平昌侯昱子嵩皆為列侯

東平憲王蒼建武十五年封東平公十七年進為王顯宗即位拜為驃騎將軍置長史掾史員四十人位在三公上以東郡之壽張須昌山陽之南平陽濠湖陵五縣益東平國立四十五年薨子懷王忠嗣明年帝乃分東

平國封忠弟讓為任城王餘五人為列侯忠立十一年薨子孝王敞嗣立四十八年薨子頃王端嗣立四十七年薨子凱嗣立四十一年魏受禪降為侯

永平二年封憲王蒼子二人為縣侯十一年賜蒼列侯印十九枚諸王子年五歲已上能趨拜者令帶之永元十年封蒼孫梁為矜陽亭侯敞弟六人為列侯永寧元年封蒼孫二人為亭侯

任城孝王尚東平憲王蒼之子懷王忠之弟元和元年

封食任城亢父樊三縣立十八年薨子貞王安嗣立十九年薨子節王宗嗣立三十一年薨無子國絕延熹元年桓帝立河間孝王子恭為參戶亭侯博為任城王以奉其祀立十三年薨無子國絕熹平四年靈帝復立河間貞王遜新昌侯子佗為任城王奉孝王後立四十六年魏受禪廢為侯

永元十四年封孝王尚子福為桃鄉侯亢為當塗鄉侯

阜陵質王延建武十五年封淮陽公十七年進爵為王

二十八年就國三十年以汝南之長平西華新陽扶樂

四縣益淮陽國後坐罪徙為阜陵王立五十一年薨子

殤王冲嗣二年薨無嗣和帝復封冲兄魴是為頃王立

三十年薨子懷王恢嗣立十年薨子節王代嗣立十四

年薨無子國絕桓帝立勃道亭侯便親為恢嗣是為恭

王立十三年薨子孝王統嗣立八年薨王子赦立建安

中薨無子國除

永元八年封頃王魴弟十二人為鄉亭侯 延光三年封懷王恢兄弟五人為鄉亭侯

廣陵思王荆建武十五年封山陽公十七年進爵為王立二十九年坐使巫祭祀祝詛自殺十四年封荆子元壽為廣陵侯又封元壽第三人為鄉侯元壽卒子商嗣商卒子條嗣

臨淮懷公衡建武十五年立未及進爵為王而薨無子國除

中山簡王焉建武十五年封左馮翊公十七年進爵為王三十年徙封中山王立五十二年薨子夷王憲嗣立二十一年薨子孝王弘嗣立二十八年薨子穆王暢嗣立三十四年薨子節王稚嗣無子國除

永元四年封夷王憲弟列侯十一人 永寧二年封孝王弘二弟為亭侯 永和六年封穆王暢弟荆為南鄉侯

瑯琊孝王京建武十五年封瑯琊公十七年進爵為王

永平二年以泰山之蓋南武陽華東萊之昌陽盧鄉東
牟六縣益瑯琊立三十一年薨子夷王宇嗣立二十年
薨子恭王壽嗣立十七年薨子貞王尊嗣立十八年薨
子安王據嗣立四十七年薨子順王容嗣立八年薨子
熙嗣在位十一年建安時坐謀欲過江被誅

建初七年封夷王宇第十三人為列侯 永初元年
封恭王壽弟八人為列侯 延光元年封貞王尊弟
四人為鄉侯 永和五年封安王據弟三人為鄉侯

右光武子十王

千乘哀王建永平三年封明年薨年少無子國除

陳敬王羨永平三年封廣平王七年徙為西平王肅宗
崩遺詔徙為陳王食淮陽郡立三十七年薨子思王鈞
嗣立二十一年薨子懷王竦嗣立二年薨無子永寧元
年立敬王子安壽亭侯宗為陳王是為頃王立五年薨
子孝王承嗣薨子愍王寵嗣後為袁術殺其國相駱俊
陳由此敗

永元十二年封思王鈞六弟為列侯 永初七年封敬王孫安國為耕亭侯

彭城靖王恭永平九年賜號靈壽王

取其美名未有國邑

十五年

封為鉅鹿王建初三年徙封江陵王改南郡為國元和二年徙為六安王以廬江郡為國肅宗崩遺詔徙封彭城王食楚郡立四十六年薨子孝王道嗣立二十八年薨子頃王定嗣立四年薨子孝王和嗣立六十四年薨孫祗嗣七年魏受禪降為侯

永初六年封靖王恭子阿奴為竹邑侯 元初五年
封考王道第三人為鄉侯 本初元年封定兄弟九
人皆為亭侯

樂成靖王黨永平九年賜號重熹王十五年封樂成王
建初四年以清河之游觀津渤海之東光成平涿郡之
中水饒陽安平南深澤八縣益樂成國立二十五年薨
子哀王崇嗣立二月薨無子明年和帝立崇兄修侯巡
為樂成王是為釐王立十五年薨子隱王賓嗣立八年

薨無子明年立濟北惠王子莢為樂成王後坐罪貶臨
湖侯延光元年以河間孝王子得嗣靖王後以樂成比
廢絕故改國曰安平孝王立三十年薨子續嗣立三十
四年坐不道誅國除

下邳惠王衍永平十五年封四年以臨淮郡及九江之
鍾離當塗東城歷陽全椒合十七縣益下邳國立五十
四年薨子貞王成嗣立二年薨子愍王意嗣立五十七
年薨子哀王宜嗣薨無子國除

永建元年封貞王成兄二人及惠王孫二人皆為列侯
陽嘉元年封愍王意弟八人為鄉亭侯

梁節王暢永平十五年封為汝南王建初四年徙為梁
王以陳留之鄆寧陵濟陰之薄單父犄氏成武凡六縣益
梁國立二十七年薨子恭王堅嗣立二十六年薨子懷
王匡嗣立十一年薨無子順帝封匡弟孝陽亭侯成為
梁王是為夷王立二十九年薨子敬王元嗣立十六年
薨子彌嗣立四十年魏受禪降為侯

永元十六年封恭王堅弟二人為鄉侯

淮陽頃王昞永平五年封常山王建初四年徙為淮陽
王以汝南之新安西華益淮陽國立十六年薨子殤王
側嗣立十三年薨無子立兄防子侯章為常山王立二
十五年薨是為靖王子頃王儀嗣立十七年薨子節王
豹嗣立八年薨子暭嗣三十二年遭黃巾賊棄國走建
安十一年國除

永建二年封頃王儀兄二人為亭侯 永嘉元年封

節王豹兄四人為亭侯

濟陰悼王長永平十五年封建初四年以東郡之離狐
陳留之長垣益濟陰國立十三年薨於京師無子國除
右孝明子八王

千乘貞王伉建初四年封立十五年薨子寵嗣永元七
年改國名樂安立二十八年薨是為夷王子鴻嗣鴻生
質帝梁太后詔以樂安國土卑濕租委鮮薄改鴻封渤
海王立二十六年薨是為孝王無子太后立桓帝弟蠡

吾侯悝為渤海王奉鴻嗣立二十五年為王甫誣以大
逆自殺國除

平春悼王全以建初四年封其年薨葬京師無子國除
清河孝王慶建初四年立為皇太子後廢為清河王立
二十五年薨長子祐嗣殤帝是為安帝鄧太后崩安帝
乃上慶尊號曰孝德皇子愍王虎威嗣立三年薨無子
鄧太后立樂安王寵子延平為清河王是為恭王立三
十五年薨子蒜質帝崩太尉李固等議徵立之梁冀及

曹騰等不從遂立桓帝甘陵人劉文等謀立蒜事覺坐
奪爵自殺國除明年立安平孝王子經為甘陵王奉孝
德皇祀是為威王立二十五年薨子貞王定嗣立四年
薨子獻王忠嗣立十三年薨嗣子為黃巾所害無後國
除

永初元年封孝王慶少子常保為廣川王

濟北惠王壽以永元二年封分太山郡為國立三十一
年薨子節王登嗣立十五年薨子哀王多嗣立三年薨

無子立戰鄉侯安國為濟北王是為釐王立十年薨子
孝王次嗣立七年薨子鸞嗣薨子政嗣薨無子國除
永寧元年封節王登弟五人為鄉侯 本初元年封
孝王次弟猛為亭侯

河間孝王開以永元二年封分樂成渤海涿郡為國立
四十二年薨子惠王政嗣立十年薨子貞王建嗣立十
年薨子安王利嗣立二十八年薨子陔嗣立四十一年
魏受禪為侯

陽嘉三年封惠王政弟十三人為亭侯

蠡吾侯翼河間孝王開子元初六年鄧太后徵濟北河間王諸子詣京師以翼為平原懷王後懷王勝和帝子後為王聖江京等所譖貶為都鄉侯父開上書願分蠡吾縣以封翼順帝從之翼卒子志嗣為大將軍梁冀所立是為桓帝梁太后詔追尊河間孝王為孝穆皇蠡吾先侯曰孝崇皇皆立陵廟置令丞更封帝兄都鄉侯碩為平原王留博陵奉翼後建安十一年國除

解瀆亭侯淑以河間孝王子封淑卒子長嗣長卒子弘
嗣為大將軍竇武所立是為靈帝追尊皇祖淑為孝元
皇皇考長為孝仁皇立陵廟置令丞拜河間安王利子
康為濟南王奉孝仁皇祀康薨子贇嗣贇薨子開嗣立
十三年魏受禪降為侯

城陽懷王淑以永元二年分濟陰為國立五年薨於京
師無子國除

廣宗殤王萬歲以永元五年封分鉅鹿為國其年薨無

子國除

右孝章子七王

平原懷王勝和帝長子少有痼疾延平元年封立八年薨葬於京師無子鄧太后立樂安夷王寵子得為平原王奉勝後是為哀王立六年薨無子太后又立河間王開子都鄉侯翼為平原王嗣安帝廢之國除

右孝和子一王

按范蔚宗東漢書敘諸王止於和帝蓋自孝和以

後殤冲質三帝皆早世安順桓三帝皆無子惟靈
帝二子皇子辯陳留王協辯嗣位為董卓廢而殺
之立協是為獻帝獻帝六子其二為曹操所殺建
安十七年封熙為濟陰王懿為山陽王邈為濟北
王敦為東海王然是時政在曹氏天下三分雖有
封爵之名而實無所謂土地租食矣既封後九年
魏始受禪四王皆降為列侯云

世祖初大司馬吳漢請封皇子不許重奏連歲建武十

五年三月乃詔令羣臣議大司空融固始侯通膠東侯復高密侯禹太常登等奏議曰古者封建諸侯以藩屏京師周封八百同姓諸姬並為建國夾輔王室尊事天子享國永長為後世法故詩云大啟爾宇為周室輔高祖聖德光有天下亦務親親封立兄弟諸子不違舊章陛下德橫天地興復宗統褒德賞勲親睦九族功臣宗室咸蒙封爵多受廣地或連屬縣今皇子賴天能勝衣趨拜陛下恭謙克遜抑而未議羣臣百姓莫不失望宜

因盛夏吉時定號位以廣藩輔明親親尊宗廟重社稷
應古合舊厭塞衆心臣請大司空上輿地圖太常擇吉
日具禮儀制曰可夏四月戊申以太牢告祀宗廟丁巳
使大司空融告廟封皇子輔為右翊公英為楚公陽為
東海公康為濟南公蒼為東平公延為淮陽公荆為山
陽公衡為臨淮公焉為左翊公京為瑯琊公

按秦罷侯置守曾不數年始皇死而羣雄蠱起六
國之裔與其強宗大縣皆逐秦守宰而自王故地

秦亡之後項羽主約霸天下然所建置諸侯亦多是已自王之人及漢東出并三秦討項羽劉項之勢既分而諸侯多附漢其中立懷兩端者皆為漢所擊滅如趙歇魏豹田橫之類是也既滅項氏之後羽所建諸侯其存者惟共敖臧荼然亦不旋踵而俘之然後裂土以封韓彭英盧張耳韓信吳芮之徒蓋自是非漢之功臣不得王矣逮數年之後反者九起異姓諸侯王多已夷滅於是悉取其地

以王子弟親屬如荆吳齊楚淮南之類蓋自是非
漢之同姓不得王矣然一再傳而後賈誼鼂錯之
徒拳拳有諸侯强大之慮蓋以為親者無分地而
疏者偏天子必為子孫之憂於是或分其國或削
其地其負強而動者則六師夷之蓋西漢之封建
其初也則勦滅異代所建而以畀其功臣繼而勦
滅異姓諸侯而以畀其同宗又繼而勦滅疏屬劉
氏王而以畀其子孫蓋檢制益密而猜防益深矣

昔湯武雖以征伐取天下然商惟十一征周惟滅
國者五十其餘諸侯則皆襲前代所封未聞盡以
宇內易置而封其私人周雖大封同姓然文昭武
穆之邦與國咸休亦未聞成康而後復畏文武之
族偏而必欲夷滅之以建置己之子孫也愚嘗謂
必有公天下之心而後可以行封建自其出於公
心則選賢與能而小大相維之勢足以綿千載自
其出於私心則忌疎畏偏而上下相猜之形不能

以一朝居矣景武而後令諸侯王不得治民補吏
於是諸侯雖有君國子民之名不過食其邑入而
已土地甲兵不可得而擅矣然則漢懲秦之弊復
行封建然為人上者苟慕美名而實無唐虞三代
之公心為諸侯者既獲裂土則遽欲效春秋戰國
之餘習故不久而遂廢蓋罷侯置守雖始於秦然
諸侯王不得治民補吏則始於西都景武之時蓋
自是封建之名存而封建之實盡廢矣至東漢更

始既入關雖盡王諸造謀復漢者然諸人雖有受
封之名多聚處京師布列要職實未嘗有裂土建
國南面稱孤之事光武既定天下至建武十五年
方封諸皇子為公十七年皇子之為公者方進爵
為王徐徐如此未嘗有盡王子弟以鎮服天下之
意蓋是時封建之實已亡尺土一民皆上自制之
諸侯王不過食其邑入之租而於所謂藩維屏扞
本無所預故亦不必急急然視為一大事如周漢

有天下之初也

明帝永平三年封皇子建為千乘王羨為廣平王十五年封皇子恭為鉅鹿王黨為樂成王衍為下邳王暢為汝南王昞為常山王長為濟陰王初帝按地圖將封皇子悉半諸國明德馬后見而言之曰諸子食數縣於制不已儉乎帝曰我子宣宜與先帝子等乎歲給二十萬足矣

按前漢孝文之時梁懷王薨賈誼上疏拳拳以諸

侯强大皇子單弱為慮欲帝徙皇子大其封疆而
帝從之後漢顯宗則謂我子豈宜與先帝子等於
是封皇子悉半光武所封諸王與孝文異意何也
蓋孝文之時分封之大小可以驗國勢之強弱顯
宗之時分封之大小不過係租入之豐儉國勢則
宗藩強而皇子弱殊非強幹弱支之遠慮租入則
兄弟豐而諸子儉乃見先人後已之公心然亦可
以知封建一事至東漢之初名存實亡故諸侯王

土地之大小初無係於理亂安危之大勢矣

建初四年按輿地圖令諸國戶口皆等租入歲皆八千萬

東漢皇子封王其郡為國諸王受封者受茅土歸以立

社

胡廣曰諸侯受封皆受茅土歸立社稷本朝為宮室自有制度至於列侯歸國者不受茅土不立宮室各

隨其貧富而裁別

王國有傳

如師不臣相秩二千石二千石

之庶以守其寵

內史

如郡丞

中尉郎中令

相行縣三老執轡學官處士皆乘車馬隨後所頡亭傳輒講經

掌王大夫郎中宿

僕

主車馬

持書

奉使至京都

謁者禮樂長衛

衛官如光祿勳

士長醫工長永巷長祠祀長郎中其紹封削黜者中尉
內史官屬隨亦率減

文獻通考卷二百六十八

欽定四庫全書薈要卷九千五百九十

史部

文獻通考卷二百六十九

鄱陽馬端臨貴與著

封建考十

東漢列侯

漢舊制列侯奉朝請在長安者皆位次三公中興以來
惟以功德賜位特進者在三公下次車騎將軍賜位朝
侯在九卿下次五校尉賜位侍祠侯次大夫其次下土

小國侯以肺腑親公主子孫奉墳墓於京師亦隨時朝

見是為猥諸侯也

漢官儀曰皇后父兄率為特進侯朝會位次三公故章帝啓馬太后曰漢

典舅氏之封侯猶皇子之為王其功臣四姓為諸侯侍祠侯皆在卿校之下

明帝為四姓小

侯開立學校置五經師

外戚樊氏郭氏陰氏馬氏為列四姓以非列侯故曰小侯

侯歸國者不受茅土不立宮室以戶數租入為節諸紹

封者皆食故國半租罪侯歸不得臣吏民 初漢制皇

女皆封縣公主儀服同列侯其尊崇者加號長公主儀

服同蕃王諸王女皆封鄉亭翁主儀服同鄉亭侯

漢書謂齊

厲王姊為紀翁主以紀氏所生因以為號章帝惟特封東平憲王蒼瑯琊孝

王京女為縣公主其後安帝桓帝妹亦封長公主同之

皇女其皇女封公主者所生之子襲母封為列侯皆傳

國於後鄉亭之封則不傳襲永初元年鄧太后詔封清河孝王慶女十一人皆為

鄉公主分食邑俸列侯國置相其秩各如本縣主治民如令長不臣也但納租於侯以戶數為

限其官隨國大小為增減食邑千戶以上置家丞庶子

各一人此家臣也使理家事不滿千戶則不置家丞舊置行人洗

馬門大夫等官又悉省諸公主各置家令一人東觀書曰其主

薨無子置傳
一人守其家

功臣侯

太傅高密侯鄧禹南陽新野人以杖策從帝渡河運籌
將兵入關拜大司徒建武元年封鄼侯食邑萬戶二年
更封梁侯食四縣十三年以功高定封為高密侯永平
元年薨謚元侯帝分禹封為三國長子震為高密侯襲
為昌安侯珍為夷安侯少子鴻永平中為小侯

高密侯震子乾

成

褒子某嗣爵

昌

某襲母爵

為舞陰侯 昌安侯襲子藩 夷安侯珍子良無後

康子珍紹封

中山太守全椒侯馬成南陽棘陽人世祖討河北從征
伐以擊斬李憲功建武七年封平舒侯二十七年定封
全椒侯三十二年卒子衛 香徙封棘陵侯 豐 元
邑 醜桓帝時以罪失國 昌延熹二年以成玄孫
復封為益陽亭侯

大司馬廣平侯吳漢南陽宛人世祖討王郎漢說漁陽

太守彭寵以郡歸帝賜號建策侯擊羣賊先登陷陣帝
即位拜大司馬更封舞陽侯建武二年封廣平侯食四
縣十一年討公孫述滅之二十年薨諡忠侯子哀侯成
嗣為奴所殺二十八年分漢封為三國成子旦為濯陽
侯奉漢嗣旦弟盱為筑陽侯成弟國為新蔡侯漢兄尉
為將軍從征戰死封尉子彤為安陽侯帝以漢功大復
封弟翕為褒親侯吳氏侯者凡五國 旦無子國除
盱子勝

河南尹阜成侯王梁漁陽安陽人為郡吏與太守彭寵以漁陽歸光武從平河北與寇恂南拒洛陽北守天井關帝即位拜大司空封武強侯十三年增邑定封封阜成侯十四年卒官子禹嗣 堅石坐父弟與楚王英謀反誅

左將軍膠東侯賈復南陽冠軍人為縣掾下江兵起復亦聚眾數百人歸漢後北渡河從光武擊青犢五校羣盜破之帝即位為執金吾封冠軍侯渡河攻朱鮪降之

建武二年益封穰朝陽二縣十三年定封膠東侯食郁
秩壯武下密即墨挺胡觀陽凡六縣三十一年卒謚剛
侯子忠嗣 敏坐誣告母殺人國除 肅宗更立復小
子邯為膠東侯邯弟宗為即墨侯各一縣 育邯子長

參宗子建

瑯琊太守祝阿侯陳俊南陽西鄂人少為郡吏光武徇
河北為安集掾從擊銅馬五校破之建武二年封新處
侯破張步董憲十三年增邑定封祝阿侯二十三年卒

子浮嗣 專諸 篤

建威大將軍好時候耿弇扶風茂陵人父況王莽時為

朔調連率

莽改上谷郡曰朔
調太守曰連率

莽敗更始立弇奉奏詣長

安至宋子會王郎起兵乃馳謁光武說帝發漁陽上谷

兵攻拔邯鄲誅王郎為大將軍從擊銅馬赤眉青犢尤

來大槍諸盜破之光武即位拜建威大將軍封好時候

食好時美陽二縣定彭寵取張豐張步十三年增戶邑

永平元年卒謚愍侯子忠嗣 馮 良 協

隃廩侯霸弇弟況少子況以上谷郡歸光武後封隃
廩侯卒 子霸嗣 文金 喜 顯 援

牟平侯舒弇弟亦況子況初封牟平舒襲封 襲
寶坐罪自殺國除 箕復封牟平侯 恒別封陽亭
侯

驃騎大將軍參遽侯杜茂南陽冠軍人歸光武於河北
為中堅將軍常從征伐帝即位拜大將軍封樂鄉侯建
武二年封苦陘侯擊五校平之拜驃騎大將軍十三年

增邑封脩侯十五年坐罪免官削戶邑定封參遽鄉侯

十九年卒子元嗣坐罪國除

奉

茂孫

復封安樂亭侯

執金吾雍奴侯寇恂上谷昌平人王郎起恂說上谷太守耿況以郡歸光武拜偏將軍號承義侯從破羣賊拜河內太守轉輸軍糧建武二年拜潁川太守封雍奴侯邑萬戶從討隗囂拜執金吾十二年卒謚威侯子損嗣釐襲恂同產弟及兄子妹以軍功封列侯者八人終其身不傳於後

積弩將軍昆陽侯傳俊潁川襄城人世祖徇襄城以縣
亭長迎軍從破王尋等世祖討河北從軍建武二年封
昆陽侯三年破秦豐七年卒謚威侯子昌嗣坐罪貶關
內侯

鐵

昌子

復封高置亭侯

征南大將軍舞陰侯岑彭南陽棘陽人王莽時守本縣
長漢兵起彭守宛攻之數月食盡乃降大司徒伯升義
之封為歸德侯光武徇河內彭與太守韓歆迎降拜刺
姦大將軍從平河北帝即位圍洛陽令彭說降朱鮪建

武二年遷征南大將軍討鄧奉擊秦豐破之封舞陰侯
九年討公孫述大破之為述遣刺客所殺謚壯侯子遵
嗣 伉 杞 熙 福 世祖思彭功復封遵弟淮為
穀陽侯

左曹合肥侯堅鐔潁川襄城人世祖討河北署主簿從
平河北擊破大槍帝即位拜揚化將軍封曄強侯與諸
將攻洛陽降朱鮪六年定封合肥侯二十六年卒子鴻
嗣 浮 雅

征西大將軍夏陽侯馮異潁川父城人漢兵起異以郡
掾監五縣城守拒漢間出行屬縣為漢兵所執光武署
為主簿從渡河北從破王郎封應侯與寇恂合勢拒朱
鮪擊鮪破之建武二年封夏陽侯入關代鄧禹討赤眉
大破之定關中擊隗囂拜征虜將軍十年薨謚節侯子
彰嗣 普有罪國除 晨安帝時復封 世祖思異功
復封彰弟訢為祈鄉侯

上谷太守淮陵侯王霸潁川潁陽人漢兵起霸率賓客

從光武從擊破尋邑從渡河北討王郎斬之得其璽綬
封王鄉侯建武二年封富波侯討周建擊盧芳破之十
三年增邑戶更封向侯上谷太守三十年定封淮陵侯
永平二年卒子符嗣 度 歆

建義大將軍鬲侯朱祐南陽宛人漢兵起伯升拜大司
徒以祐為護軍從世祖討河北常力戰陷陣為偏將軍
封安陽侯世祖即位拜建義大將軍更封堵陽侯擊鄧
奉秦豐降之十三年增邑封鬲侯食邑七千三百戶二

十四年卒子商嗣 演 冲

信都太守阿陵侯任光南陽宛人漢兵起率衆從軍與
世祖破尋邑更始至洛陽以光為信都太守王郎起郡
國皆降之光獨以郡迎世祖拜左大將軍封武成侯共
擊郎滅之建武元年更封阿陵侯五年卒子隗嗣 屯

勝 世

征虜將軍潁陽侯祭遵潁川潁陽人光武破王尋等署
為門下史從征河北以為刺姦將軍建武二年拜征虜

將軍封潁陽侯擊張滿鄧奉張豐等破之六年與諸將討隴蜀九年卒謚成侯無子國除

豫章太守中水侯李忠東萊黃人王莽時為新博屬長莽改信都國曰新博都尉曰屬長更始立忠與任光同奉世祖以為右

大將軍封武固侯建武二年更封中水侯食邑三千戶從平龐萌董憲等十四年遷豫章太守十九年卒子威嗣純廣

驃騎大將軍櫟陽侯景丹馮翊櫟陽人為上谷屬令更

始立遣使者徇上谷世祖引見丹拜偏將軍號奉義侯
從擊王郎破之從征河北帝即位拜驃騎大將軍封櫟
陽侯二年薨子尚嗣 苞 臨無子國除 遽苞弟封
監亭侯

右將軍槐里侯萬脩扶風茂陵人更始時為信都令與
太守任光等迎世祖拜偏將軍封造義侯從平河北建
武二年更封槐里侯病卒子晉嗣徙封泣氏侯 親徙
封扶柳侯無子國除 豐脩曾 復封曲平亭侯 熾

恭

虎牙大將軍安平侯蓋延漁陽要陽人為彭寵護軍王
即起與吳漢等同歸光武從平河北帝即位以延為虎
牙將軍建武二年更封安平侯討劉永董憲龐萌等皆
平之十三年增封定食萬戶十五年薨子扶嗣側坐

謀反國除

恢延曾孫

復封盧亭侯遂

太常靈壽侯邳彤信都人初為王莽和成卒正

莽分鉅鹿為和

成郡世祖徇河北彤舉城降王郎起彤與信都獨不附郎

以二郡迎世祖軍拜後大將軍拔邯鄲封武義侯建武

元年更封靈壽侯行大司空事帝入洛陽拜太常六年

卒子湯嗣

某無子國除

音彤孫

復封平臺侯

柴

衛尉安成侯銑期潁川陝人光武略地至潁川召署賊

曹掾從徇薊拜偏將軍從擊王郎破之拜虎牙大將軍

擊破銅馬赤眉青犢等帝即位封安成侯食邑五千戶

五年拜衛尉十年卒謚忠侯子丹嗣

舒羽蔡

帝復封丹弟統為建平侯

驍騎將軍昌城侯劉植鉅鹿昌城人王郎起植與宗族
聚兵數千人據昌城迎世祖以為驍騎將軍說降真定
王劉揚從平河北建武二年更封植為昌城侯討密縣
賊戰歿于向嗣述坐與楚王英反謀國除喜植弟與
植同謀迎帝以功封觀津侯歆植兄亦同謀封浮陽侯
二人皆傳國於後

東郡太守東光侯耿純鉅鹿騎都尉世祖渡河純迎謁
王郎反純自邯鄲率宗族從帝封耿鄉侯從平王郎破

銅馬帝即位封高陽侯拜東郡太守六年定封東光侯

十三年卒謚成侯子阜嗣坐罪國除 盱復封高亭侯

騰忠緒

植純從弟

為輔威將軍封武邑侯 宿

純從弟

至代郡太守封遂鄉侯

訢純弟

為赤眉將軍封著

武侯

橫野大將軍山桑侯王常

事跡已見更始所立諸王下

城門校尉朗陵侯臧宮潁川陝人少為亭長游徼率賓

客入下江兵中為校尉從光武征戰至河北以為偏將

軍從破羣賊數陷陣却敵建武二年封成安侯與岑彭
吳漢共滅公孫述十三年增邑更封鄼侯十五年定封
朗陵侯永平元年卒謚愍侯子信嗣 震 松坐罪國

除

由

松弟

紹侯

大司空固始侯李通

事跡見更始所立諸王下

捕虜將軍揚虛侯馬武南陽湖陽人王莽末入綠林中
遂與漢兵合世祖破王尋拜振威將軍與謝躬等攻王
郎從擊羣賊常為軍鋒帝即位以為侍中騎都尉封山

都侯討劉永擊隗囂十三年定封揚虛侯永平四年卒
子檀嗣坐兄與楚王英謀國除震武孫紹封濔亭侯
側

大司空安豐侯竇融扶風平陵人王莽末從王邑軍敗
於昆陽莽亡以軍降更始大司馬趙萌萌薦融為鉅鹿
太守融見更始新立東方尚擾不欲出關以累世在河
西乃辭鉅鹿萌為言得為張掖屬國都尉更始敗武威
張掖酒泉金城燉煌共推融行河西五郡大將軍事建

武五年遣使奉書獻馬於洛陽與五郡太守會兵討隗
囂八年帝西征融朝見高平第一詔以安豐陽泉蓼安
安風四縣封融為安豐侯隴蜀平與五郡太守奏事京
師拜大司空永平二年卒謚戴侯 穆坐罪死 嘉

萬全 會宗 武

驃騎將軍慎侯劉隆南陽宗室更始拜為騎都尉從世
祖於河內與諸將共拒朱鮪等建武二年封亢父侯四
年討平李憲十三年增邑封竟陵侯坐罪免明年復封

為扶樂鄉侯以擊交趾功更封長平侯三十年定封慎侯中元二年卒謚靖侯子安嗣

太傅宣德侯卓茂南陽宛人初辟為丞相孔光府史後遷密令王莽居攝以病免更始立以茂為侍中祭酒以年老乞骸骨世祖即位先訪求茂茂詣河陽謁拜為太傅封褒德侯食邑二千戶建武四年卒子崇嗣徙封汎鄉侯 琴 訢 隆無子國除

建武二年正月悉封諸功臣為列侯梁侯鄧禹廣平侯

吳漢皆食四縣餘各有差下詔曰諸將業遠功大誠欲傳於無窮其顯效未酬名籍未立者大鴻臚趣上朕將差而錄之博士丁恭議曰古帝王封諸侯不過百里強幹弱枝所以為治也今封四縣不合法制帝曰古之亡國皆以無道未嘗聞功臣地多而滅亡者也乃遣謁者即授印綬策曰在上不驕高而不危制節謹度滿而不溢敬之戒之傳爾子孫長為漢藩陰鄉侯陰識貴人之兄也以軍功當增封識叩頭曰天下初定將帥有功者

衆臣托屬掖庭仍加爵邑不可以示天下此為親戚受
賞國人計功也帝從之帝令諸將各言所樂皆占美縣
河南太守丁綝獨求封本鄉或問其故綝曰綝能薄功
微得鄉亭厚矣帝從其志封新安鄉侯帝使郎中馮勤
典諸侯封事勤差量功次輕重國土遠近地勢豐薄不
相踰越莫不厭服焉

致堂胡氏曰古之亡國皆以無道帝言是也未聞
以地多而亡者則有中否焉先王分土三等自百

里而殺柄制輕重足以有邦小則財賦甲兵亦能
自守大則禮樂征伐不得僭行自唐虞迄三代襲
為成法漢初既不能復光武再造宜稽古以有為
因丁恭之言詳立善制而又率意所欲苟簡建置
且是時以功勲錫茅土豈皆有道之人邪土宇既
廣所入既厚滿而不溢誰克臻茲故聖王之法必
關盛衰焉

十三年大饗將士頒爵冊勲功臣增邑更封凡三百六

十五人

范蔚宗曰中興二十八將前世以為上應二十八宿未之詳也然咸能感會風雲奮其智勇稱為佐命亦各志能之士也議者多非光武不以功臣任職至使英姿茂勲委而勿用然原夫深圖遠算固將有以焉爾若乃王道既衰降及霸德猶能授受惟庸勲賢皆序如管隰之迭升桓世先趙之同列文朝可謂兼通矣降自秦漢世資戰力至於翼扶

王運皆武人崛起亦有鬻繒屠狗輕猾之徒或崇以連城之賞或任以阿衡之地故勢疑則隙生力侔則亂起蕭樊且猶縲紲信越終見菹戮不其然乎自茲以降迄於孝武宰輔五世莫非公侯遂使縉紳道塞賢能蔽壅朝有世及之私下有抱關之怨其懷道無聞委身草莽者亦何可勝言故光武鑒前事之違存矯枉之志雖寇鄧之高勲耿賈之鴻烈分土不過大縣數四所加特進朝請而已觀

其治平臨政課職責咎將所謂導之以政齊之以
刑者乎若格之功臣其傷已甚何者直繩則虧恩
喪舊撓情則違廢禁典選德則功不必厚舉勞則
人或未賢參任則羣心難塞並列則其蔽未遠不
得不校其勝否即以事相權故高秩厚禮允答元
功峻文深憲責成吏職建武之世侯者百餘若夫
數公者則與參國議分均休咎其餘並優以寬科
全其封祿莫不終以功名延慶於後昔留侯以為

高祖悉用蕭曹故人而郭伋亦譏南陽多顯鄭興
又戒功臣專任夫崇恩偏授易啓私溺之失至公
釣被必廣招賢之路意者不其然乎永平中顯宗
追感前世功臣乃圖畫二十八將於南宮雲臺其
外又有王常李通竇融卓茂合三十二人故依其
本第係之篇末以志功臣之次云爾

廷尉西華侯鄧晨南陽新野人娶光武姊元漢兵起晨
將賓客從更始立以為偏將軍從擊破尋邑王郎反與

光武會鉅鹿下從擊邯鄲帝即位封房子侯拜中山汝南太守徵為廷尉封西華侯二十五年卒謚惠侯子棠嗣固國福無子國除光武復封晨長子汎為吳房侯奉公主之祀

中郎將征羌侯來歙南陽新野人光武祖姑之子更始即位以歙為吏以病去更始敗東詣洛陽拜大中大夫奉詔說隗囂遣子入質囂叛與祭遵等征之十一年攻公孫述破其兵述遣刺客害之贈中郎將征羌侯帝以

歆有平羌隴之功故改汝南之當鄉縣為征羌國謚節
侯子裒嗣 歷 定 虎 帝嘉歆忠節復封歆弟由
為宜西侯

伏波將軍新息侯馬援扶風茂陵人王莽時為新成大
尹莽末避地涼州依隗囂說囂歸光武囂使援奉書洛
陽遣子入質後囂發兵拒漢援諫不從從帝西征囂平
之拜隴西太守擊羌破之交趾反討平之拜伏波將軍
封新息侯後征武溪蠻病卒為梁松所譖收侯印綬肅

宗時謚忠成侯 子廖等見外戚侯門

按史言伏波輔佐中興之功不減雲臺諸將獨以椒房之戚不得預焉然鄧晨光武姊婿也來歙光武祖姑之子也晨之捨宗從義歙之捐軀徇國其功烈雖劣於寇鄧馮耿而賢於臧宮馬武邳彤鉞期之流遠矣蓋三公者俱非泛泛之外戚而徒以依乘取恩澤侯之比也故叙其事於雲臺功臣侯者之次

慶吾劉永將建武三年以斬永首來降封列侯

韓湛為吳漢校尉以擊斬董憲封列侯

安丘侯張步王莽末起兵據瑯琊既而受劉永命後斬永將蘇茂來降封安丘侯八年坐謀反誅

漁浦侯意帛李憲軍士憲敗走帛斬其首來降封

建忠侯彭寵為漁陽太守王郎之起獨以郡歸光武封建忠侯後反誅

不義侯子密彭寵蒼頭寵反子密斬其首來降封

鵠羌侯隗恂隗囂長子囂遣入侍拜胡騎校尉甘侯後
囂叛帝數遣書諭之不從乃誅恂而討之

向義侯王遵隗囂將數勸囂歸漢囂叛諫辭甚切不從
乃與家屬東詣京師拜大中大夫封上洛侯

陽都侯伏湛瑯琊東武人建武三年拜大司徒封後徙
封不其侯邑三千六百戶十三年卒子歆嗣 光 晨

無忌 質 完為曹操所殺國除

則鄉哀侯侯霸河南密人建武四年拜大司徒十三年

薨追封則鄉侯食二千六百戶子昱嗣 建昌

袁氏曰漢初丞相選用列侯至武帝用公孫弘起
自疏遠未有爵邑於是封平津侯丞相封侯自此
始光武中興尚仍前制伏湛代鄧禹為大司徒封
陽都侯湛免以侯霸代之止封關內侯凡歷九年
而薨帝始下詔曰漢家舊制丞相拜日封為列侯
朕以軍師暴露功臣未封緣忠臣之義不欲相踰
未及爵命奄然而終因追封霸為則鄉侯其比西

京之制雖未鐫削亦淹緩矣自是之後位三公者皆不復有茅土之封惟靈帝初陳蕃為太傅錄尚書事實太后優詔封為高鄉侯蕃固辭不受自是宰相封侯之制遂廢

扶陽侯韓歆南陽人以大司徒封坐直言免自殺

枸邑侯宋弘京兆長安人建武二年為大司空封後徙封宣平侯卒無子國除

節鄉正侯趙熹南陽宛人建武二十七年拜大尉帝崩

受遺詔典喪禮封肅宗即位進為太傅錄尚書事建初
五年薨子代嗣直淑無子國除

陽武侯朱浮沛國蕭人以從光武定北邊建武二年封
舞陽侯食三縣後徙封父城侯二十年為大司徒徙封
新息侯永平中坐單辭所告賜死

成義侯梁統安定烏氏人以武威太守與河西大將軍
竇融等同歸漢封後更封高山侯後定封陵鄉侯子松
嗣坐誹謗下獄死國除

富平侯張純京兆杜陵人高祖父安世為大司馬封富平侯純少襲爵土遭王莽篡封者多廢純以敦謹保全前封建武初先來詣闕得復國二十三年為大司空中元元年薨謚節侯子奮嗣甫吉無子國除

陽平侯桓焉沛郡龍亢人榮之孫順帝為皇太子被廢焉力爭不能順帝既立拜太傅以前廷議守正封後為太尉順典賜爵關內侯

陵陽侯丁鴻潁川定陵人父緄王莽末世祖略地潁川

絀說其宰降後征伐有功封定陵新安鄉侯後徙封陵陽食邑五千戶建初四年徙封魯陽鄉侯和帝時為司徒六年薨子湛嗣 浮 夏

平鄉侯謝安下邳人順帝末羣盜起安率衆斬盜首徐鳳封邑三千戶

右鄉侯度尚山陽湖陸人桓帝時為荊州刺史坐破平羣盜封

烏程東鄉侯抗徐丹陽人為長沙太守與度尚俱坐平

盜封

鄧侯鄧邯南陽新野人中興初以功封仕至渤海太守
子鳳嗣

安鄉侯張禹趙國襄國人安帝即位以定策功封食邑
千二百戶後拜太尉子盛

龍鄉侯徐防沛國銍人安帝即位以定策封千一百戶
拜太尉卒子衡嗣

育陽安樂鄉侯胡廣南郡華容人以定策立桓帝封梁

冀誅坐奪爵土

安國亭侯袁湯汝南南陽人袁安子以豫定策立桓帝
封後遷太尉逢基

定潁侯郭鎮潁川陽翟人郭躬子為尚書坐與孫程等
誅江京閹景立順帝功封食邑二千戶拜廷尉卒子賀
嗣

福亭侯尹勤南陽人為司空以定策立安帝封無子國
除

定遠侯班超扶風平陵人坐使西域為都護安集諸國
納質內屬功封邑千戶卒子雄嗣 始坐罪誅

臨晉侯楊賜弘農華陰人楊震孫靈帝時為太傅司徒
以師傅恩封千五百戶薨子彪嗣建安十一年奪封
務亭侯楊衆震曾孫獻帝時拜侍中以步從帝東還封
宜陽鄉侯尹勲河南人為尚書令坐預誅梁冀功與僕
射霍諝尚書張敬歐陽參李偉虞放周永並封亭侯
高陽鄉侯蔡邕陳留圉人獻帝時以左中郎將從遷都

長安封後董卓誅為王允所殺

祁鄉侯黃瓊江夏安陸人桓帝時為太尉以師傅恩不
阿梁氏封邑千戶固辭許之後為司空 孫琬獻帝初
為司徒更封陽泉鄉侯

壽成亭侯皇甫規安定朝那人為度遼將軍坐平賊討
羌功封邑二百戶

新豐縣侯段熲武威姑臧人為并州刺史坐討羌胡功
封邑萬戶後為太尉王甫誅熲下獄死

遂鄉侯劉寬弘農華陰人代段熲為大尉以先策黃巾
逆謀封六百戶子松

高陽鄉侯陳蕃汝南平輿人靈帝即位以太傅輔政封
與竇武謀誅宦官為曹節等所殺

溫侯王允太原祁人獻帝初遷都長安為司徒以從遷
功封二千戶後誅董卓為卓部曲李傕等所殺

槐里侯皇甫嵩安定朝那人以左中郎將討平賊張角
封食槐里美陽兩縣八千戶後拜太尉薨

西鄉侯朱雋會稽上虞人以右中郎將討平賊張角功封後更封錢塘侯

潑鄉侯董卓隴西臨洮人靈帝中平元年為破虜將軍坐討羌功封邑千戶靈帝崩大將軍何進召卓將兵脅太后誅宦官卓既入廢少主立獻帝遷太尉更封郿侯改拜太師封弟旻為鄠侯劫帝西遷王允與士孫端等討而誅之

容丘侯劉虞東海郟人為幽州牧以討平反者張純等

功封後拜大司馬進封襄賁侯公孫瓚襲而殺之

薊侯公孫瓚遼西令支人為奮武將軍以討黃巾有功封後殺劉虞取幽州袁紹攻而殺之

潁陽侯陶謙為徐州刺史以擊破黃巾功封遷徐州牧後為曹操所擊敗死

邳鄉侯袁紹汝南汝陽人為司隸校尉與何進謀召董卓以兵誅宦官以事忤卓出奔卓拜紹渤海太守封侯紹以渤海起兵討卓領冀州牧獻帝都許以紹為太尉

封鄴侯後拜大將軍兼督冀青兗并四州引兵攻許為
曹操所敗死

武成侯劉表山陽高平人為荊州刺史討平宗賊李傕
入長安表遣使入貢拜荊州牧封武成侯建安十三年
卒曹操取其地

溫侯呂布五原九原人為董卓騎都尉封都亭侯司徒
王允與布密謀討卓卓既誅拜奮威將軍封溫侯後據
兗州曹操取其地而殺之

被陽侯歐陽欽樂安千乘人王莽時為長社宰世祖即位為河南尹封被陽侯九年更封夜侯徵為大司徒後坐賊下獄死子復嗣無子國除

褒成侯孔志魯人父均平帝時以孔子後封王莽敗失國建武十三年以志襲封卒子損嗣 曜 完

外戚侯

壽張恭侯樊宏南陽湖陽人世祖舅帝即位拜光祿大夫封長羅侯十五年更封壽張二十七年卒子儵嗣徙

封燕侯 汜時建盼尚

射陽侯丹宏弟建武十三年封

元鄉侯尋宏兄子建武十三年封

更父侯忠宏族兄建武十三年封

平望侯茂宏少子建武二十七年封

陽安節侯郭況真定人郭后弟建武十七年封永平二年卒子璜嗣竇憲誅坐死

新鄴侯竟后從兄以從征伐功封永平中卒子嵩嗣

勤無子國除

發干侯匡竟弟建武末卒子勲嗣 駿無子國除

南緣侯陳茂郭后叔父梁之壻以恩澤封

原鹿貞侯陰識南陽新野人光烈皇后之前母兄更始
時封陰德侯建武元年封陰鄉侯十五年封原鹿侯永
平二年卒子躬嗣 璜 淑 弟 璩

吳房侯綱識姪孫和帝陰后之父後坐事綱自殺

鮦陽侯慶識弟興之子永平元年封卒子琴嗣 萬

全桂

灑強侯博慶弟永平元年封

順陽安侯馬廖明德皇后之兄建初四年封永平四年
卒子遵嗣徙封程鄉侯卒無子國除鄧太后詔封廖孫
度為潁陽侯

潁陽侯防廖弟建初四年封六千戶後坐罪徙封翟
鄉侯卒子鉅嗣

許陽侯光防弟建初四年封六千戶竇憲誅憲奴誣

告光罪自殺 朗光子鄧太后詔紹封合鄉侯

章帝建初元年欲封爵諸舅太后不聽明年夏旱言事者以為不封外戚之故有司因此上奏宜依舊典太后詔曰凡言事者皆欲媚朕以要福耳昔王氏五侯同日俱封其時黃霧四塞不聞霍雨之應又田蚡竇嬰寵貴橫恣傾覆之禍為世所傳故先帝防謹舅氏不令在樞機之位諸子之封裁令半楚淮陽諸國常謂我子不當與先帝子等今有司奈何欲以馬氏比陰氏乎吾為天

下母而身服大練食不求甘左右皆著帛布無香薰之飾者欲身率下以為外親見之當傷心自勅但笑言太后素好儉前過濯龍門上見外家問起居者車如流水馬如游龍蒼頭衣綠褱領袖正白顧視御者不及遠矣故不加譴怒但絕歲用而已冀以默愧其心而猶懈怠無憂國忘家之慮知臣莫若君况親屬乎吾豈可上負先帝之旨下虧先人之德重襲西京敗亡之禍哉固不許帝省詔悲歎復重請曰漢興舅氏之封侯猶皇子之

為王也太后誠存謙虛奈何令臣獨不加恩三舅乎且
衛尉年尊兩校尉有大病如令不諱使臣長抱刻骨之
恨宜及吉時不可稽留太后報曰吾反覆念之思令兩
善豈徒欲獲謙謙之名而使帝受不外施之嫌哉昔竇
太后欲封王皇后之兄丞相條侯言受高祖約無軍功
非劉氏不侯今馬氏無功於國豈得與陰郭中興之后
等邪常觀富貴之家祿位重叠猶再實之木其根必傷
且人所以願封侯者欲上奉祭祀下求溫飽耳今祭祀

則受四方之珍衣食則蒙御府餘資斯豈不足而必當
得一縣乎吾計之熟矣勿有疑也夫至孝之行安親為
上今數遭變異穀價數倍憂惶晝夜不安坐卧而欲先
營外封違慈母之拳拳乎吾素剛急有胷中氣不可不
順也若陰陽調和邊境清淨然後行子之志吾但當含
飴弄孫不能復關政矣四年天下豐稔方陞無事帝遂
封三舅廖防光皆為列侯廖等辭遜不得已受封爵而
退

武陽侯竇憲章德皇后之兄和帝即位后臨朝拜大將軍封食邑二萬戶後坐罪自殺

鄧侯篤 汝陽侯景 夏陽侯瓌皆憲弟同時封憲敗皆自殺

樂平侯梁棠和帝母梁貴人父竦之和帝親政後封卒子安國嗣

乘氏侯雍 單父侯翟皆棠弟與棠同時封

上蔡侯鄧騭南陽人和熹皇后兄永初元年封食邑萬

戶后崩中黃門等誣告隲弟悝罪坐徙羅侯死

葉侯悝隲弟同時封元初五年卒子廣宗嗣封葉侯
后崩中黃門譖而殺之

西平侯弘隲弟同時封元初二年卒子廣德嗣 甫
德廣德弟封都鄉侯

西華侯閭隲弟同時封卒子忠嗣廣德甫德忠並為
中黃門譖死

北宜春侯閭暢安思皇后父元初三年封邑五千戶四

年卒子顯嗣更封長社縣侯食邑萬三千五百戶後坐罪誅

乘氏侯梁商順烈皇后之父襲父雍封子冀嗣拜大將軍建和元年益封萬三千戶永興二年坐罪誅

桓帝元嘉元年以梁冀有援立之功欲褒崇殊典乃大會公卿議其禮特進胡廣太常羊溥司隸校尉祝恬大中大夫邊韶等咸稱冀之勲德其制度賚賞宜比周公賜之山川土田附庸司空黃瓊獨建議曰冀前以親迎

之勞增邑三千又其子亦加封賞昔周公輔相成王制禮作樂化致太平是以大啟土宇開地七百今諸侯以戶邑為制不以里數為限蕭何識高祖於泗水霍光定傾危以興國皆益戶增封以顯其功冀可比鄧禹合食四縣賞賜之差同於霍光朝廷從之

潁陽侯不疑冀弟 潁陰侯馬不疑子 襄邑侯允

冀子 城父侯桃允子 西平侯蒙冀弟冀敗並坐

誅

南頓侯鄧演桓帝鄧后之兄后立封子康嗣

訖陽侯康 昆陽侯統 涑陽侯秉皆演兄弟同時

封

槐里侯竇武桓思皇后之父后立封五千戶桓帝崩靈
帝立輔政拜大將軍更封聞喜侯與陳蕃等謀誅宦官
為所害

脩侯董重河間人靈帝母孝仁董后兄子帝即位封帝
崩何進奏其罪自殺

不其鄉侯宋鄴扶風平陵人靈帝宋皇后之父后立封
后廢坐死

慎侯何進南陽宛人靈思皇后兄后立以功封帝崩為
大將軍輔政謀誅宦官不克為張讓等所殺

濟陽侯苗進弟進敗俱死

宦者侯

鄴鄉侯鄭衆南陽犍人和帝十四年以誅竇憲功封食
邑千五百戶永初元年和熹皇后益封三百戶元初元

年卒養子閔嗣

安

石讎

衆曾孫

封關内侯

龍亭侯蔡倫桂陽人元初元年鄧太后以倫久宿衛封
邑三百戶安帝時坐罪死國除

雍鄉侯李閔安帝時為小黃門譖鄧悝等廢平原王坐
是封三百戶

都鄉侯江京安帝時與李閔同封帝崩孫程等誅之而
立順帝

浮陽侯孫程涿郡新城人安帝時江京等譖廢太子帝

崩程等誅京迎太子立之為順帝封萬戶陽嘉元年卒
養子壽嗣

華容侯王康與孫程同立順帝功封九千戶

酈侯王國與孫程同功封九千戶

湘南侯黃龍與孫程同功封五千戶

西平昌侯彭愷與孫程同功封四千二百戶

中廬侯孟淑與孫程同功封四千二百戶

復陽侯李建與孫程同功封四千二百戶

廣宗侯王成 祝阿侯張賢 臨沮侯史汎 廣平侯

馬國 范縣侯王道 褒信侯李元 山都侯楊佗

下雋侯陳予 析縣侯趙封 枝江侯李剛俱與孫程

同功各封四千戶

夷陵侯魏猛與孫程同功封二千戶

東阿侯苗光與孫程同功封千戶是為十九侯孫程卒

賜謚剛侯王康王國彭愷王成趙封魏猛六人皆早卒

黃龍楊佗孟淑李建張賢史汎王道李元李剛九人坐

罪減租四分之一惟馬國陳子苗光保全封邑

東鄉侯籍建 都鄉侯良賀二人俱順帝為太子時小

黃門帝立以勞封

費亭侯曹騰沛國譙人以預定策立桓帝功與長樂太僕州輔等七人皆封亭侯卒養子嵩嗣

新豐侯單超河南人以預誅梁冀功封二萬戶

原武侯徐璜下邳良城人以預誅梁冀功封萬五千戶

東武陽侯具瑗魏郡元城人以預誅梁冀功封萬五千

戶

上蔡侯左悺河南平陰人以預誅梁冀功封萬三千戶
後坐罪自殺

汝陽侯唐衡潁川鄆人以預誅梁冀功封萬三千戶

誅梁冀時又封小黃門劉普趙忠等八人為鄉侯

高鄉侯侯覽山陽防東人以預誅梁冀功封後坐罪自
殺

育陽侯曹節南陽新野人以預定策立靈帝功封長安

鄉侯後以誣奏陳蕃竇武等罪將兵殺之封育陽侯邑三千戶又誣奏渤海王悝反殺之增封七千六百戶

冠軍侯王甫與曹節同惡誣殺陳蕃竇武渤海王悝等封七千六百戶光和二年司隸校尉陽球奏其罪誅之

朱瑀 共普 張亮 王尊 騰是皆以誣殺陳蕃竇

武功封瑀華容侯千五百戶普亮等五人各三百戶

都鄉侯呂強河南成臯人靈帝時例封宦者以強為鄉侯強辭讓懇惻固不敢當帝聽之後為趙忠等誣譖自

殺

都鄉侯趙忠安平人以預誅梁冀功封後與張讓等殺何進作亂袁紹勒兵誅之

張讓潁川人靈帝時與趙忠同封列侯後與趙忠作亂殺何進劫質天子為追兵所急投河死

右東漢列侯姓名之見於史傳可考者按范史世祖本紀所載建武十三年功臣增邑更封者已諡三百六十五人外戚恩澤封者已諡四十五人今

考之自世祖至獻帝十三傳凡二百年間以功勳
位望封侯者纔一百二十九人外戚四十一人宦
者六十五人然則姓名之湮沒無傳者多矣

王侯號

靈壽王

彭城靖王未封賜號靈壽王未有國邑取其美名

重熹王

樂成靖王未封賜號

重熹

王

承義侯

寇恂

成義侯

梁統

興義侯

景貺

奉義侯

景丹

輔義侯

庫鈞

扶義侯

辛彤

助義侯

竺曾

褒義侯

史苞

褒親侯

吳翕

褒德侯

卓茂

歸德侯

劉諷

褒成侯

孔志孔僖

顯親侯

竇友

建策侯

吳漢

建功侯

蓋延

宣恩侯

陰陸

討姦侯

杜習

折姦侯

燕廣

征羌侯

來歙

破虜侯

須沈

不義侯

蒼頭子密

破羌侯

榆鬼

率衆王

烏倫

率衆侯

其至

徐氏曰按漢世封侯皆以縣邑其後或以鄉亭皆

視其所食之邑而名之至於功名顯著則有特加


美名者西都信武冠軍富民博陸之類是也東漢

因之時有美號至於彭寵蒼頭以奴弑主而封之不義侯夫果不義則不應封爵使其功可封則非可言不義矣光武於是失之

按秦漢以來所謂列侯者非但食其邑入而已可以臣吏民可以布政令若關內侯則惟以虛名受廩祿而已然西都景武而後始令諸侯王不得治民漢置內史治之自是以後雖諸侯王亦無君國子民之實不過食其所封之邑入況列侯乎然所

謂侯者尚裂土以封之也至東都始有未與國邑
先賜美名之例如靈壽王征羌侯之類是也至明
帝時有四姓小侯乃樊氏郭氏陰氏馬氏諸外戚
子弟以小年獲封者又肅宗賜東平王蒼列侯印
十九枚令王子年五歲以上能趨拜者皆令帶之
此二者往往皆是未有土地先佩侯印受俸廩蓋
至此則列侯有同於關內侯者矣

文獻通考卷二百六十九



總校官庶吉士臣張能照

校對官修撰臣張書勳

謄錄監生臣張虎文

財團
法人
佛陀
教育
基金
會
釋淨
空
敬贈